

摘藻堂四庫全書薈要

史部

欽定四庫全書薈要

史部

硃批諭旨卷二百十七之三

詳校官編修臣繆晉

欽定四庫全書薈要卷八千二百十七

史部

硃批諭旨卷二百十七之三

硃批石麟奏摺

雍正七年十一月二十七日山西巡撫臣石麟謹

奏為

聖德光

天雲日獻瑞事雍正七年十一月二十六日據布政使蔣
洞詳據直隸保德州知州王清詳稱卑職於本年

十一月初二日辰時督率州民正在辦理駝厓之
頃忽覩卿雲捧日外繞三環光華四射藻彩繽紛
自辰至午照耀三時萬民咸相慶幸又據河曲縣
知縣張球興縣知縣程雲先後各詳報本年十一
月初二日自辰至午卿雲捧日外繞三環實為

聖世祥符據此理合一併具文申報等情到司轉詳前
來并據保德州知州王清具詳徑報到臣臣接閱
之際曷勝歡忭此實我

皇上至誠昭格

厚澤覃敷物阜民安率土皆歌樂育禮陶樂淑萬方共
被生成是以

上天眷佑和氣致祥當軍需辦理之時顯雲日輝煌之瑞
光華四射士庶咸觀愈徵

聖德之光昭竚見

王師之克捷實千載一時之盛事太平萬世之庥徵臣
惟益深敬惕共迓

天庥除另恭疏題

賀外謹先繕摺奏

聞謹

奏

蒙

上蒼垂示祥符如是顯著我君臣惟有愈勵敬誠以仰答
天心更黽勉父母斯民之責耳

同日又

奏為奏

聞事竊照晉省從前得雪分寸經臣繕摺奏

聞仰蒙

睿鑒茲省城於十一月十九日得雪三寸有餘又於二十
十二三兩日得雪三寸有餘又據各府州陸續報
稱所屬地方於十一月十一十五兩日各得雪二
三四五寸不等於十八十九兩日各得雪三四寸
不等於二十二三兩日各得雪三四寸不等臣查

各屬得雪雖係數寸但間日屢降凝聚在地麥苗
深得滋培之益現在咸有霑足之慶萬姓歡呼羣

頌

聖澤所有晉省十一月內連次得雪日期理合恭摺奏
聞謹

奏

覽奏得雪數寸雖云間日屢降仍恐未必霑足也

同日又

奏為奏

聞事竊照各省督標撫標提標兵丁等欽奉

上諭動支司庫銀兩酌定數目交與各該督撫提督委
員料理營運生息如遇兵丁家有吉凶之事將息銀
酌量賞給以濟其用本銀永遠存公生息不必繳還
其營運利息之處亦必公平辦理不得指稱官銀名
色或占奪百姓行業或重利刻剝閭閻與商賈小民
爭利擾累地方欽此又欽奉

上諭出征綠旗兵丁家中遇有吉凶之事著照京城驍騎之例吉禮賞銀六兩喪禮賞銀十二兩凡此賞給銀兩其有已經賞銀資生利息之處即於利息內支給其未曾賞銀及雖賞銀而尚無利息可支之處著動止項錢糧支給欽此臣俱欽遵在案并准部咨山西撫標兵丁擬賞給銀四千兩等因臣伏思此項銀兩乃

皇上惠濟兵丁之

特恩其營運生息自應籌畫妥協俾行之永遠而無虧
缺方為盡善查晉省太原城內商舖頗多伊等挾
本開張歷有年所素諳經營伊等有情願將此項
銀兩領去作本者按數分給令其代為營運生息
照伊等舖內原得之利減少交納公平辦理則於
公事有濟亦於彼有益當檄行太原府曉諭去後
隨據省城當商葉恭等一十二戶願領此銀營運
每兩每月願出息銀一分二釐共息銀四十八兩

俱按月交收府庫等情臣隨取其領結將銀發領
并即委太原府料理收放之事計自七月起至十
一月共收息銀二百八十八兩除支給過出征兵
丁家屬三名喪費銀三十六兩外現存息銀二百
五十二兩從此源源生息而兵丁永沐

皇恩於無既矣所有辦理緣由臣謹具摺奏

聞謹

奏

據奏發交商舖代為生息甚好若無勒令強從情故斯
乃極妙之舉

同日又

奏為

聖主訓誨無已微臣感激難名恭謝

天恩事竊臣齋摺把總回晉捧到

硃批摺子內有臣奏謝

皇上賞賜哈密瓜一摺并臣奏

聞晉省製造駝屨漸次告竣士民願捐車騾運送一摺
俱奉有

硃批臣仰瞻

諭旨如覲

天顏跪讀之後遵

旨傳布政使蔣洞到署臣恭捧

諭旨令蔣洞跪閱訖伏念臣一介庸愚仰蒙

聖恩簡畀晉撫重任受事以來每多過愆皆荷

寬宥矜全疊頒

訓誨俾得遵循臣受

天恩逾於常格之外感激之忱實難名言惟有公誠自
勉庶隅自勵庶立身有本稍冀仰答

高深臣時凜此心矢守不易是以夙夜兢兢第知有
國而不知有家知有

君而不知有身也況臣係微末窮員荷

皇上殊恩不次擢用職任封疆

寵榮已極每年又蒙

賞賜養廉銀三萬餘兩一切用度綽然有餘若於此外
再有貪得不肖之心稍萌苟且肆妄之志不但有
干

國憲亦必難逃

天譴茲荷

聖主訓導勗勉臣跪讀之下不禁感極涕零敬謹繕錄
朝夕虔誦益加黽勉殫誠竭力克修致身事

君之道仰報

隆恩於萬一耳理合繕摺恭謝

天恩謹

奏

睹茲晉省

天意民情如是朕便欲譴責於爾而亦有所不能也勉之
仍遵前諭毋稍肆志自滿朕嘗訓誨內外大小臣工不
但庸流之毀譽不足以爲榮辱即朕一時之喜怒亦不

必遽動欣戚之念但以方寸對越

神明時時凜懼鑒察是乃立身行己之根本趨利避害之
良方捨此而分外馳逐皆屬本末倒置試看小民踴躍
急公甫及二旬即蒙

上天昭示景象如是捷速可不興感起畏乎益當加勉勿
怠

雍正七年十二月十一日山西巡撫臣石麟謹
奏為

聖德之格被靡涯

上天之嘉應疊見事雍正七年十二月初十日據布按二司會詳據蒲州府臨晉縣胡南藩報稱為慶雲呈瑞事十二月初一日臨晉縣自午時起見祥雲歷未申酉時迴繞麗日擁護而西但見其雲五色繽紛霞光萬道疊秀爭華呈輝耀彩卑職仰瞻多時正喜慶雲獲見旋據闔邑紳士軍民羣集縣庭歡呼鼓舞以手加額咸稱

聖世嘉徵合之卑職所見相符等情會詳前來并據該縣胡南藩徑報到臣臣接閱之際曷勝歡忭欣慶伏查晉省兩月之內嘉祥疊見此皆我

皇上至德光

天仁恩匝地惟太和之氣翔洽於閭閻斯休徵之應屢著於雲日臨晉素稱疲悍之區年來感沐

皇仁咸知遵法急公查自康熙五十六年至雍正六年共積欠錢糧一十六萬餘兩今一載以來已清完

一十三萬餘兩本年錢糧已完至八分有奇即此
民風之丕變實由

皇仁之淪浹而

天人之感應益徵其捷如影響也除另恭疏題

賀外謹先繕摺奏

聞謹

奏

據奏臨晉慶雲捧日不禁以手加額覽焉因蔣洞之奏

先到已備悉批諭於伊摺內可取觀之

雍正八年正月初十日山西巡撫臣石麟謹

奏為奏

聞事竊照晉省雍正七年入冬以後節次得雪日期俱
經臣繕摺

奏報嗣於十二月二十六七八等日省城得雪四寸
有餘又據各屬陸續報稱各得雪二三四五寸不
等麥苗在地連得瑞雪滋培且新年以來風和日

暖積雪消融土脈滋潤更見青葱茂發此皆我
皇上愛養元元至誠感格所致是以連得瑞雪普利用
疇臣惟與闔屬官民額手歡呼共慶昇平而已所
有得雪日期理合恭摺奏

聞謹

奏

覽歲內得雪新春和暖情形朕深為欣悅都中亦於此
三日得雪霑足今於十六日又蒙

上天賜雪三寸有餘大率直隸各省俱於去冬均沐
天恩矣惟雲貴閩粵尚未據奏到

雍正八年正月二十六日山西巡撫臣石麟謹
奏為奏

聞事竊照晉省於雍正八年正月十六日辰時起至亥
時止省城得雪一尺三四寸又據各屬報稱各得
雪自四五寸至一尺及一尺有餘不等臣思麥苗
在地去冬連得瑞雪滋培今復得雪一尺有餘且

風和日暖消融入土將見麥隴青蔥更加茂盛矣
所有得雪緣由恭摺奏

聞謹

奏

此真祥瑞也欣悅覽焉

雍正八年二月十二日山西巡撫臣石麟謹

奏為欽奉

上諭事竊臣據布政使蔣洞恭捧

硃批諭旨一道竝廣東督臣郝玉麟奏摺一件到臣署
隨敬謹跪讀欽奉

諭旨觀近日晉省百姓情形便有此等匪類亦不能搖
惑萬一但既有此論汝等可密諭屬員各處留心訪
緝將郝玉麟奏摺一併發來與汝同石麟密觀料理
毋得聲張極加慎密可也特諭欽此欽遵復密觀督
臣郝玉麟奏摺內情由俱一一領悉臣查晉省連

歲豐登

皇恩疊沛士民咸各尊

君親上感激勉勵無不家安戶樂共慶昇平已在

聖明睿照之中第晉省之人經營於四方者居多恐往
來粵省及粵省流寓晉地之民或有被其煽誘相
通聲氣者自宜急為訪緝臣當即遵

旨密諭各屬員於四境內細加密訪查拏不得聲張洩
漏亦不得滋擾良民通行密諭在案臣復密令人
於各通衢要隘等處細行訪查務期消弭姦匪寧

謚地方所有微臣欽奉

諭旨現在辦理緣由理合先行奏

聞謹

奏

從來匪類之為害生民甚於盜賊盜案命案有失主苦
主為證尚易於追求至若匪類率皆暗地潛藏蹤跡詭
秘全賴地方大員留心發擿方能消患於未然此輩各
有耳目倘汝等法令嚴明訪緝細密自將回心斂迹斷

不至聞聲附和羣聚多人何有如呂留良輩肆行無忌
至數十年之久也此事不待粵省奏聞奉朕飭諭而後
始加察究者嗣後當加意防範但有風聞立即嚴飭各
屬訪拏務獲窮詰實情毋避生事之嫌甘為聾瞽而貽
害於地方督撫中能察究匪類惟李衛為第一爾當倣
效之將此諭亦令兩司知悉

雍正八年三月十七日山西巡撫臣石麟謹

奏為欽奉

聖訓敬謹遵行恭摺叩謝

天恩事竊臣標把總齎回臣奏

聞查緝廣東匪類一摺奉有

硃批臣跪讀

諭旨如覲

天顏隨遵

旨傳布政使蔣洞按察使宋筠到署臣恭捧

諭旨各令跪閱訖伏查禁戢姦匪理宜消弭於未然若

悠忽容隱為害非淺今欽奉

訓示周詳無微不燭臣當以此事時時留心并督率屬
員各各嚴密謹慎勤加察訪但有風聞即當拏究
不敢少懈於平時亦不敢寬縱於已覺惟凜遵

聖訓察究匪類消患未萌以仰副我

皇上教誨生成之至意耳所有微臣遵奉感激之忱謹
繕摺恭謝

天恩謹

奏

當不時留心密行察訪毋致日久生懈勉之

同日又

奏為欽奉

諭旨察訪奏

聞事竊臣前奏晉省士民急公效力情願運送繩屨緣

由摺內奉有

硃批恐新補大同總兵徐起鳳不能勝任

命臣留心察訪的確據實秉公密奏等因欽此欽遵臣
察訪得鎮臣徐起鳳自雍正七年十一月到任至
年底未見有所行為至本年正月初十日看兵之
後即陸續考驗所轄各營大小官弁甄別舉劾俱
從公道約束兵丁亦稱嚴肅至於辦事每於文移
中見其亦明白老成緣大同距省六百餘里鎮臣
徐起鳳到任以來因無公事相會臣尚未與之謀
面茲留心細加察訪現在之措施如此若始終不

懈實力整飭於邊方誠屬相宜臣謹遵

旨察訪的確據實秉公奏

聞伏乞

皇上睿鑒謹

奏

若如所奏徐起鳳乃一好總兵於初到時能如此行為
日久熟練自必更有可觀也

同日又

奏為奏

聞事竊照晉省地方今春正月內得盈尺之雪經臣具摺奏

聞茲省城於三月初五日十一日俱得雨二寸又據各屬節次報稱於三月初五初六初八十一等日各得雨三四五六寸不等農夫俱及時耕耘咸頌

聖主念切民生是以膏雨應時而降得以盡力田畝莫不鼓舞歡呼等情前來臣查時當春耕得此雨澤

不特麥苗興長即布種五穀亦皆滋潤而發生矣
所有得雨緣由恭摺奏

聞謹

奏

都中近日頗覺乾旱朕正晝夜憂心覽爾晉省雨澤之
奏深為慰悅雖然須至秋成後方敢言其必然也但宜
益加誠敬以俟之定蒙

上天默錫嘉應勉之

同日又

奏為奏明雍正六年耗羨銀兩事竊照晉省耗羨銀兩歷年俱繕造

黃冊奏報在案茲據布政使蔣洞冊造雍正六年分額徵耗羨銀三十七萬一千三百九十六兩零內已完銀三十六萬五千四百六十兩零支給各官養廉并各項公費共開除銀二十九萬三千六百五十九兩零實在現貯司庫銀七萬一千八百一

兩零民欠未完耗羨銀五千九百三十六兩零竝
將四柱總數各州縣已未完數繕造

黃冊各一本詳請轉

奏前來經臣逐一覆核相符謹將

黃冊恭呈

御覽為此謹

奏

此種冊籍朕亦何暇觀覽總在汝等秉公節慎辦理其

中之是與非公與私何能逃衆論也

雍正八年四月初八日山西巡撫臣石麟謹

奏為奏

聞事竊照晉省地方三月二十四五兩日省城得雨三寸有餘二十七八兩日又得雨四寸有餘茲於四月初一日至初四日每日得雨四五六寸不等十分霑足又據各屬陸續報稱自三月二十四日起至四月初四日止各得雨七八九寸不等普徧霑

足等情前來臣查晉省地方半屬高岡土坡且時值孟夏通省連得膏雨入土滋培高原下隰無不周徧稻黍粟麥俱各青蔥鬱茂此皆我

皇上至誠感召之所致臣正在繕摺具

奏聞於初七日又得雨六寸有餘所有連得時雨緣

由恭摺奏

聞謹

奏

自春以來晉省得雨優渥實慰朕懷以手加額覽之

同日又

奏為遵

旨詳查辦理奏請

睿裁事竊臣標齋摺把總回晉捧到

硃批選拔貢生蕭澍條奏一摺欽奉

硃批諭旨蕭澍條奏此二事當詳查辦理者欽此欽遵

臣閱蕭澍條奏內稱鴈門關關門不全稽查不密

請將鴈門巡檢移至廣武以嚴稽查廣武守備移駐鴈門以扼要路竝將關門修補一事臣遵

旨詳查并行布按二司暨鴈平道會同查明議詳去後茲據司道等會呈據代州詳稱遵查鴈門關城有南北二門其北門現有二扇該巡檢早啓夜閉惟南門原毀一扇今已將南門製造北門加修俱堅固完備并飭巡檢乘時啓閉加謹稽查至守備巡檢移駐之處查廣武南至鴈門計二十里兩山盤

谷中間僅有溪河山路一條並無別徑可通欲進
鴈門舍廣武隘口無由而上是廣武地方實為鴈
門之咽喉地處扼要且坐落平坦舊有堡城居民
稠密而關北各屯俱設有分防營汛今守備駐防
廣武在雲朔既可控制而鴈門亦有屏藩若移駐
鴈門則去廣武寫遠關後各屯巡檢微員非惟不
能彈壓且鴈門高處山岡彈丸之地既無建蓋營
署之所而居民寥寥水草無多亦難駐防兵馬則

彼此移駐於關隘地方似屬俱無裨益等情洞等
會查該州所議移駐未便之處似屬妥協但鴈門
本屬要地今止有巡檢一員弓兵十五名及汛兵
五名恐不敷稽查巡緝諸務似應添設外委把總
一員再派撥兵五名庶足以資防守等因臣隨咨
商大同鎮去後茲准鎮臣徐起鳳以司道所議誠
屬妥協移覆到臣臣細加酌議似應亦如司道等
公詳為是又蕭澍條奏內稱大同府大有倉所貯

米石甚多若不出陳易新將來必有霉爛之虞請
按數運赴朔平府抵兌右衛兵糧將大同府屬應
解給右衛兵糧之新米歸倉還項一事臣遵

旨詳查并行布政司大同府朔平管糧廳各查明議詳
去後茲據布政司詳據署朔平同知詳稱右衛八
旗官兵口糧每歲所需米石向係大朔二府屬州
縣解交常豐倉按月支給今欲以大同府屬州縣
應解常豐倉新米路經郡城者即換兌大有倉陳

米運交支給以新易舊雖似兩便但常豐倉亦尚有從前存貯之陳米六萬餘石因八旗官兵向來俱係支領新米若竟以陳米放給則必爭嫌較論惟在管糧者於收到各屬新米設法籌畫將陳米配搭放給官兵帖服無辭除經搭放竝雍正六七兩年出糶外今本倉尚有歷存陳米豌豆黑豆綠無項動撥而積貯現多仍宜一面漸次搭放一面

呈請

題明照常平倉出陳易新之例每年夏糶秋還實為
妥便至常豐倉現有陳米自毋庸又換大有倉之
陳米也等情隨又行據大同府詳稱大有倉存貯
米石換兌右衛兵糧之處既不便舉行但倉貯陳
米共十二萬九千餘石上年具詳咨部請糶嗣奉
部允時已八月秋成在望糶賣無幾今仍請

題明每年於青黃不接之時減價平糶儘糶儘買不
數年間則皆可易新矣各等情前來臣細加酌議

似應照朔平同知及大同府所詳為是以上二事
臣就地方情形逐細詳查如此辦理庶為妥協但
臣材識短淺是否有當伏乞

聖明訓示臣另具

題所有詳查緣由理合恭摺

奏覆請

旨謹

奏

所奏是汝斟酌允妥後徑行具疏題請辦理不必援引
前奏

雍正八年四月二十四日山西巡撫臣石麟謹

奏為奏

聞事竊照晉省地方連得時雨緣由臣俱恭摺奏

聞茲省城於四月二十至二十一日膏雨綿密又得一

尺有餘又據各屬陸續報稱於四月十二十七十

八二十二十一等日各得雨六七八寸不等四野

霑足并稱隴麥長發高二三尺不等現在吐花出穗十分茂盛萬民歡呼咸頌

皇仁等情到臣臣惟凜遵

聖訓益深誠敬并與闔屬官民額手慶頌靡已所有得雨尺餘及夏麥長發情形謹繕摺奏

聞恭慰

聖懷謹

奏

以手加額覽之朕實深為汝慶幸也京都於月之二十
五日甘霖透足是日雨意甚廣西望雲色濃郁想爾晉
省自必又沐霑潤矣

雍正八年五月十三日山西巡撫臣石麟謹

奏為

聖化感孚遐邇邊民重義還金恭摺奏

聞事竊臣據布政司詳據朔平府左雲縣申稱據縣屬
助馬堡鄉約張廣基報稱緣有本堡民人趙亨清

於本年三月十二日路由堡洞拾起銀子一包不知兩數見有字封知係餉銀隨赴守備衙門首明交訖理合稟報據此卑職正在詳報間又准助馬路守備移據外委千總劉開震稟稱三月十二日據本營馬兵劉朝選於本日支關春季三箇月餉銀九兩一錢九分零忽因馬驚將銀遺失回家方知隨從原路找尋間忽有本堡民人趙亨清手持餉銀一封向開震說係伊在堡門洞裏拾著此銀

見封皮上有字知是兵丁餉銀止要到衙門給還
本主開震接過餉銀見係原封未動理合稟明等
語據此隨喚趙亨清劉朝選細問朝選認係原關
餉銀又云趙亨清拾去理應亨清使用據趙亨清
稱還人遺物乃是常事分毫不要等因移會到縣
擬合詳報由府轉申到司相應轉報等情又准大
同鎮臣徐起鳳移咨到臣伏思我

皇上仁恩廣被教化咸孚久已俗美風醇拾金不昧所

在多有顧以邊徼窮黎而知慕義興廉益見

聖化之隆靡遠弗屆也除一面給發花紅扁額行令該
縣嘉獎外事關風化臣不敢壅於上

聞為此謹

奏

據奏朔平民人拾金不昧知道了候另有旨諭部

雍正八年六月二十八日山西巡撫臣石麟謹

奏為恭報二麥豐收事竊照晉省二麥收成分數臣

留心細加訪問并據各府州縣開報前來查得山西共一百六州縣而十分收成者八十一州縣九分收成者十五州縣八分收成者十州縣詢之野老農夫僉稱今歲雨水調勻二麥收成有向來豐年每畝收一石者今竟收至一石一二斗實為數十年之僅見莫不歡欣鼓舞咸頌

皇仁臣謹按各屬所報分數欽遵

諭旨分別開明據實另繕清摺恭呈

御覽謹

奏

蔣洞奏摺先到隨經批諭并命伊將朕所批持與爾看
矣茲不更諭

雍正八年十月二十六日山西巡撫臣石麟謹
奏為奏

聞事竊照晉省於十月二十一日得雪二寸有餘又據
各屬陸續報稱於十月十八二十一等日各得雪

二三四五寸不等且有得雪至八寸暨一尺者查
麥苗在地欣逢瑞雪滋培大有裨益萬姓歡呼咸
稱嘉瑞所有晉省得雪日期理合恭摺奏

聞謹

奏

覽得雪情形朕懷深慰

雍正八年十一月初九日山西巡撫臣石麟布政
使臣蔣洞謹

奏為欽奉

上諭事竊臣等接到大學士公馬爾賽等來字內開雍正八年八月二十五日奉

上諭聞得山西武鄉縣知縣張憲齡年已七旬目已昏翳審事不能剖斷百姓有泥土地之謠壺關縣知縣許溥年逾七旬到任一載於地方事務全不經心因該縣距府二十里知縣應辦之事俱係知府王景望代為辦理祁縣知縣羅著藻在任五載怠惰廢弛有

珠商被竊一事意欲朦混歸結且辦事糊塗用刑甚酷上年曾因私忿杖斃騾夫一人民有怨言陵川縣知縣高永滋貪劣性成多方取利陵川一邑每年額稅四十餘兩高令加至四百餘兩又陵川窮民挖山採鐵鍊打釘頭者從來無徵稅之例而高令聽信蠹役婁起鳳等私索稅銀又錢糧火耗竟至加二以外士民含怨以上諸條係朕訪聞如此爾等可密寄信去詢問石麟蔣洄欽此字寄到臣等仰見我

皇上明目達聰察吏安民之至意臣等隨公同逐一確

查又復細加密訪查武鄉縣知縣張憲齡實在現
年五十四歲精力尚健惟兩目有微翳係自幼發
痘受傷所致名為風淚眼而目光仍是清明其居
官小心勤慎操守謹飭惟存心慈愛審事少欠風
厲至事之曲直仍無所枉武鄉縣地僻事簡張憲
齡辦事安靜尚屬人地相宜壺關縣知縣許溥年
近六旬辦事遲鈍因係舉人出身尚堪課士業經

援例

題請改就教職在案祁縣知縣羅著藻在任五載辦事勤幹廉隅自勵洵堪驅策其珠商被竊一事緣平遙縣珠商孔奇相等赴祁邑趕赴廟集貨賣在縣民渠上疏舖內住宿珠銀被竊具呈控縣尚未審結至杖斃騾夫一案緣羅著藻於署平遙縣任內家人羅祈昌與騾夫趙鼎鰲索銀口角羅祁昌稟知羅著藻隨拘喚到縣於雍正六年三月二十

三日分別責做發放訖趙鼎鰲受責之後染患時
證醫藥罔效於四月初一日身故彼時經汾州太
原二府會審確情委係病死並非杖斃取有屍子
醫生甘結在案陵川縣知縣高永滋徵收稅務盈
餘一案查該縣額解商畜二稅歷來俱係牙行包
納起解其中盈餘俱被牙僧衿棍侵肥自高永滋
到任後將稅銀改為官收按則儘收儘解雍正七
年分除完解正稅外共解盈餘銀一百六十九兩

零造入奏銷在案牙僧無從染指遂造流言散布
究於商民實無剝削至鐵行向有牙稅惟陵邑鐵
釘舖戶十二家從前原不徵稅高永滋初次清查
曾令照熟鐵例認稅旋因各家俱係打釘之舖即
行停止臣等密諭澤州府弔取該縣收簿卷宗細
加察核高永滋實無私行多收入已情弊再查錢
糧火耗一項該縣收耗實止加一三之數祇緣花
戶完糧每用市銀合市戔上櫃及傾銷足色扣準

庫平俱算入耗內致有加二之傳說但查高永滋雖無貪婪實蹟其居官平常辦理事務未甚洽於民心因其為人尚屬小心屢經訓飭冀其勉勵後效以上四員事款欽奉

上諭詢問臣等逐一細加訪察其實情蓋如此不敢稍為容隱謹據實公同繕摺覆

奏伏候

睿鑒謹

奏

知道了平時於屬員既不能勤訪察嚴懲勸迨朕親有聞見指名詢及若又不秉公據實奏覆而涉於遮掩文飾則大不可也

雍正八年十二月二十日山西巡撫臣石麟謹

奏為奏

聞事竊臣據寧武縣詳稱十二月十六日據本城店家曹珍報稱午刻有一行十一人到店投宿稱係內

務府蘇奉

密旨辦理機密事件等情到縣又奉府飭查隨親詣店內問據戴水晶頂人稱姓蘇名致隆係介休縣人在京范毓馥處辦事我是蒙

皇上欽賜的五品頂帶在內務府管稅司行走奉十七王爺轉奉

內諭往陝西辦機密事去及訊其有無執照所辦何事則稱我們替

皇上辦事從無執照我是採買軍需駱駝的再訊其寧武非往陝西大路至跟隨之人是否同伴又稱要往永寧州送信與范毓鵠之親家于姓跟隨之人內張保張弼是家人從京跟出來的其餘高瓚等七人是太原汾州等處人在朔州遇見要回家去的有余海川是朔州雇來引路的還未到等語行蹤詭祕言語支離未敢輕縱除看守外擬合通報等情前來臣據報除行按察司飭令嚴加看守并

一面移咨內務府查覆外理合繕摺奏

聞謹

奏

此事明係光棍詐冒無疑嚴拏究擬具奏以聞

雍正九年正月初十日山西巡撫臣石麟謹

奏為欽奉

上諭事竊臣前奏蘇致隆等蹤跡可疑一摺齎摺人回

奉有

硃批諭旨同日又接到大學士公馬爾賽等寄字內開
雍正九年正月初二日奉

上諭上年十二月內山西巡撫石麟摺奏寧武縣客店
曹珍家內有居歇十一人行蹤可疑該縣詰問有一
人稱姓蘇名致隆係范毓黻家夥計奉差辦理軍需
機密事務等語朕以此必無之事批令石麟嚴拏究
擬隨據內務府戶部奏稱山西巡撫石麟有文來查
問蘇致隆是否奉差往陝西辦理軍需有無假冒等

因臣等傳問范毓醵據稱今年十一月內果親王著
令採辦軍需皮襖因為數甚多隨差夥計蘇致隆等
前往大同寧武等處採買皮襖恐其聲張致擡市價
囑其不得以實情告人今巡撫來文有雖無騷擾地
方嚇索銀錢但蹤跡殊難憑信之語是蘇致隆等實
無騷擾多事之處竊念軍需緊要萬難遲緩祈為轉
奏行文晉撫等語戶部內務府查范毓醵夥計到山
西辦理軍需實有其事爾等可即寫字寄與石麟將

蘇致隆等十一人釋放無庸審問其有名未到者亦不必關提欽此寄字到臣臣隨欽遵

諭旨飛飭寧武縣將蘇致隆等十一人即行釋放其有名未到者不必關提外所有欽遵緣由理合繕摺奏

聞謹

奏

從前朕亦以為必係假冒無怪地方有司報稱行蹤可

疑總因其人言語糊塗有以自取也

同日又

奏為奏

聞事竊照晉省地方於雍正八年十月二十一日得雪
情形經臣具

奏在案嗣據各府州陸續報稱十一月十一暨十二
月初三十六二十一等日各得雪二三四寸不等
茲省城於十二月二十七日得雪二寸二十九日

得雪三寸又據各屬申報於二十七八九等日各得瑞雪自二三四五寸以至八九寸一尺不等等因前來此皆我

皇上愛養元元至誠感格所致是以屢得瑞雪普利田疇臣惟與闔屬官民共額手慶祝昇平而已所有屢次得雪日期恭摺奏

聞謹

奏

據奏晉省於歲底屢次得雪朕深為慰慶

雍正九年二月初十日山西巡撫臣石麟謹

奏為欽奉

上諭事竊臣接到大學士公馬爾賽等寄字內開雍正八年十二月二十六日奉

上諭今年直隸山東江南河南有被水之州縣聞本地乏食窮民有餬口散往鄰封者若該地方官員視為他處之人不肯加意賑恤必致流離失所且三春耕

種之時若不旋歸本土又必致荒棄故業朕心甚為軫念爾等可寫字寄與各省督撫令其轉飭有司凡遇今年外來被災就食之窮民即動支常平倉穀大口日給一升小口五合核實賑恤再動用存公銀兩賞為路費資送回籍並行文知會原籍地方官收留照看總在該督撫督率屬員善於料理以副朕念其所用銀穀著該督撫查核報銷嗣後以此為例欽此

寄字到臣臣即欽遵

上諭轉飭各屬敬謹奉行去後隨據陽曲縣申報賑恤
過直隸獻縣窮民二十一口寧津縣窮民四口榆
次縣申報賑恤過獻縣窮民十七口徐溝縣申報
賑恤過寧津縣窮民四口黎城縣申報賑恤過山
東東平州窮民十六口樂平縣申報賑恤過江南
邳州窮民五口平遙縣申報賑恤過江南壽州窮
民十口崞縣申報有山東歷城縣窮民桑海等九
口因伊子桑一昭在歸化城開舖生理前往相依

該縣即捐給盤費放行等情并各分別資送起行
在案臣復時加督率各員實心實力辦理不但到
境停住之窮民當賑恤資送即過往來經過在途
之窮民亦須稽查收留賑恤資送務使窮民無流
離困苦之虞蚤旋本土各安耕作以仰副我

皇上軫恤羣黎有加無已之至意所有欽遵奉行緣由
理合奏

聞謹

奏

好實力奉行以副朕意

同日又

奏為奏

聞事雍正九年二月初九日據解州夏縣知縣趙尚友
具稟稱本月初四日據署教諭高振呈送匿名帖
一紙內開走狗狂惑不見烹祥麟反作釜中羹看
徹世事渾如許頭髮衝冠劍欲鳴又稱曾靜可殺

不殺呂晚村無罪坐罪真古今一大恨事也為此
感憤傾吐血性倘好義君子與我同心請將此詩
傳布宇內俾當途聞之轉奏

天闕庶

朝廷知所悔改而梟會之首存呂之孤則刑罰中人
心服矣區區痴想不無望於萬一等語卑職隨赴
學面詢高教官竝與祭文武各生據稱此字不知
係何人暗貼是祭畢時有門斗說秀才們都在西

角門外看牆上有貼的什麼字哩。稟知教官就同去看。用醋噴濕。高教官親手揭下來看了。拏去的等語。卑職復細驗帖內看徹二字俱揭破一半。尚有一半字在何。又用新紙另寫看徹二字粘補原字之下。其字跡係出一人之手。顯有情弊可疑。似此喪心病狂。暗肆悖逆。殊難寬縱。除密訪外。理合稟明等情。具稟到臣臣接閱之下。深為痛恨。如此逆賊。大干法紀。除即密諭飭令司道及該州縣作

速密訪將貼帖之正賊姓名察實嚴拏務獲嚴究
有無同黨星飛詳報毋致聲張洩露疎縱遠颺并
差臣標千總前往該縣督同訪拏必期獲到究擬
外臣謹據稟先行奏

聞謹

奏

該縣令教官果肯實心根究自不難查出當盡力訪拏
務獲毋使姦匪漏網

雍正九年三月初七日山西巡撫臣石麟謹

奏為

聖主之訓誨無已微臣之察吏不周仰請

睿鑒嚴加處分事竊臣一介庸愚荷蒙

聖恩畀以撫晉重任自蒞任以來夙夜兢兢時以察吏

安民為念緣臣才識短淺地方遼闊耳目不周致

有蒲州府知府劉登庸平陽府知府樊錢倬等利

慾薰心罔顧

功令恃其離省寫遠肆行敗檢朋比貪婪臣竟為其
欺蔽疎於覺察今蒙

皇上命刑部侍郎臣韓光基太僕寺卿臣顧琮到晉訊
明將劉登庸等解任究審以昭法紀但臣身沐

皇上至優至渥之恩而於此等劣員不能早為覺察實
深惶愧無以自容惟有跪請

聖主將臣

敕部嚴加議處以為不能覺察屬員者之戒臣謹涕泣

實陳曷勝悚慄之至謹

奏

國家功令自在何待汝之奏請

雍正九年三月二十二日山西巡撫臣石麟謹

奏為奏

聞事竊照晉省地方入春以來連得瑞雪經臣恭摺具奏嗣據各屬陸續報稱於二月初六十七八九暨三月初四五六七八等日各得雨二三四五六寸不

等省城於三月初六日得雨一寸茲於二十日又
得雨三寸伏思雨水關乎年歲之收成生民之粒
食無時不厯

宸衷今晉省各屬連得時雨普利田疇二麥得此滋潤
更見青蔥茂發萬姓歡呼咸頌我

皇上念切民依感召庥和之所致也所有連得時雨情
由理合繕摺奏

聞謹

奏

覽得雨情形深為晉民慶慰

雍正九年七月初七日山西巡撫臣石麟謹

奏為恭報二麥豐收事竊照晉省二麥收成分數臣

留心訪問并據各府州縣開報前來查山西共一百六州縣今十分收成者八十五州縣九分收成者十四州縣八分收成者四縣七分收成者二縣六分收成者一縣野老農夫黃童白叟莫不歡欣

鼓舞共慶盈寧臣謹按各屬所報分數欽遵

諭旨分別開明據實另繕清摺恭呈

御覽謹

奏

欣覽二麥收成分數不禁以手加額焉

同日又

奏為奏

聞事竊查晉省地方入夏以來四五兩月雨水均各調

勻充足六月內初三十三二十一等日各屬俱節
次得有雨澤省城六月初四十七二十九三十等
日各得雨三四寸并據各屬陸續報稱六月二十
八九日并三十日各得雨二三四五寸不等霑足
者甚多茲省城七月初六日又得雨五寸四郊霑
足及時甘雨秋禾甚屬得濟臣惟欽遵

聖諭敬謹修省詳慎刑獄并宣示官民各加儆惕改過

斯語

可嘉果實實

如此居心

遷善仰祈

上

天自然有照鑒也天鑒甘雨頻施普利田疇勉之勉之以上慰

聖主睿懷所有現在得雨緣由恭摺奏

聞謹

奏

覽

同日又

奏為請

旨事臣伏查雍正八年六月二十一日奉

諭旨聞自京赴太原駐劄滿兵不遵法令騷擾百姓

特命護軍統領臣宗室哈爾吉前來帶領回京并令會

同臣將不遵法令生事之兵丁逐一查出從重懲

治即在太原府大街枷號示衆其該管章京之不

能約束者亦著查出題叅將臣交部嚴察議奏等

因經統領臣哈爾吉於七月十四日到晉隨會同

臣查訊并取檔案查對將與民人互相角口鬪毆

之驍騎關保住等八人雖經臣責處過仍酌其輕

重復行懲處外所有正藍旗滿洲旗分傅齊保佐
領下驍騎傅海擅入民人院內與婦人角口一案
臣石麟當即查知究問因係角口已將傅海鞭責
在案復會同研訊據傅海供稱與婦人互相角口
是實竝無進人家去等語臣等隨將傅海重責枷
號於太原府南門內示衆并將章京叅領等查叅
等因經哈爾吉帶兵回京覆

奏在案嗣於雍正九年二月二十八日准兵部咨將

臣暨章京叅領等照例分別議處緣由知照到臣
其枷號之傳海作何發放未經議及臣隨咨請部
示續准兵部咨覆令仍欽遵原奉

諭旨查照可也等因臣查傳海不遵法令生事角鬪兩
經責懲枷號已將一載今應否開枷押解回旗出
自

聖恩臣未敢擅便為此謹

奏

將傅海開枷釋放解交該旗另行請旨

雍正九年十月初六日山西巡撫臣石麟謹

奏為恭報

盛世豐年收成分數事竊照晉省地方今歲雨水調勻
田禾暢茂當茲百穀咸登之候據各府州縣陸續
開報分數前來查晉省共一百六州縣今十分收
成者五十三州縣九分收成者十六州縣八分收
成者二十四州縣七分收成者十三州縣黃童白

叟羣相鼓舞感頌

皇仁臣謹將各屬所報分數遵奉

諭旨分別開明另繕清摺恭呈

御覽為此謹

奏

晉省收成分數以手加額覽焉

雍正九年十一月初二日山西巡撫臣石麟謹

奏為預籌移貯倉糧以裕軍需仰祈

睿鑒事竊照大同府大有倉朔平府常豐倉存貯糧石
原以備軍需之用本年四月內准部咨令將大有
倉米四萬石常豐倉米二萬石賣給范毓麟將價
收存秋後買補還倉現今已飭催買補第大朔二
府相連直省今歲來晉販糴者多米價不甚平減
且有關於民食採買亦難急迫伏查晉省各屬存
貯各案倉穀并密陳管見事案內歷年所買之穀
計共有百萬餘石仰沐

皇仁連歲豐收未有動用現皆實貯臣愚請將密陳管

見事案內穀石除大朔二府屬之外酌動十五萬石令各屬碾米九萬石雇覓車騾運赴大有倉五萬石常豐倉四萬石加謹收貯以備不時之用似於軍需有益二處倉廩如有不敷即酌量添造其運送之口袋腳價碾米工資及造倉等費請於司庫收貯雍正八年存公銀內動用事竣造冊送部查銷至運動過各屬穀石仍請動存公銀兩照數

此項穀石應動正項錢糧買補還倉臣因預籌軍需起見應否舉行伏乞

乞

聖主訓示遵行如蒙

俞允臣即一面辦理一面具

題為此繕摺請

旨謹

奏

預籌軍需之見甚是一面辦理一面題奏可也

雍正九年十一月初五日山西巡撫臣石麟謹

奏為奏請量加兵米折價以廣

皇仁事竊照晉省各鎮營兵丁月支不敷米石歷年俱
照雍正元年

題定時估價值折給採買即本年十月內估撥壬子
年兵丁折價月米及赴甘兵丁養贍家口應支月
米之數亦已照例造冊送部請撥在案但晉省今
歲因直豫二省民人赴晉販買搬運絡繹相繼以

致米價日增若仍照

題定時估折給兵丁買食維艱臣謹遵雍正元年欽

奉如遇價值高昂之年該督聲明具奏之

恩旨於

題定時估之外量請加增臣查三關鎮屬朔州營兵
丁不敷折價月米五百八十五石每倉石

題定時估價銀四錢五分今查朔州等處現在米價
每倉石一兩一二錢不等可否將兵丁折價每石

再加折銀三錢大同鎮屬各營路兵丁不敷折價
月米共一萬五千六百二十石零每倉石

題定時估價銀四錢五分今查大同府等處現在米
價每倉石一兩二三錢不等可否將兵丁折價每
石再加折銀三錢殺虎協營兵丁不敷折價月米
共三千二百五石零每倉石

題定時估價銀五錢三分今查朔平府等處現在米
價每倉石一兩一二錢不等可否將兵丁折價每

石再加折銀二錢二分腹裏各營內撫標太原孟
壽等營兵丁不敷折價月米共四千六百四十四
石零每倉石

題定時估價銀五錢四分今查太原平定等處現在
米價每倉石一兩二三錢不等可否將兵丁折價
每石再加折銀二錢六分太原鎮標平陽等營兵
丁不敷折價月米共八千九百八十二石零每倉
石

題定時估價銀六錢今查平陽潞安等處現在米價
每倉石一兩三四錢不等可否將兵丁折價每石
再加折銀二錢汾州石樓等營兵丁不敷折價月
米共二千九百八十七石零每倉石

題定時估價銀五錢二分今查汾州等處現在米價
每倉石一兩四五錢不等可否將兵丁折價每石
再加折銀二錢八分以上價值俱按其原定之數
并現在米價酌量加增計通共加折銀九千四百

五兩零俾兵食無虞訓練有資感沐

皇仁無既并據布政使蔣洞查議相同臣不揣冒昧具

奏伏候

聖主睿裁施行謹

奏

該部議奏

同日又

奏為奏

聞事竊查大同鎮臣徐起鳳於雍正七年十一月到任
之後欽奉

諭旨令臣察訪具奏臣查徐起鳳彼時任事伊始考驗
官弁皆稱秉公操練兵丁俱屬嚴肅是以據實覆
奏在案至今歲以來即聞其年力漸衰覺察多疎聽
任家人書役朦蔽作弊然知之尚未確實今臣署
理提篆陸續調取各營員赴省考驗面加詢問并
復細訪知鎮臣徐起鳳惟任聽家人張二潘二稿

房書辦金質貴用事遇官弁請咨領劄按其大小
索銀三四十兩六七十兩不等前又將繭紬數百
足分發該鎮衙門人等二百足及標下三營每營
各三四十足不等每足令繳價銀三兩四錢又迎
送過往酒席程儀俱支銷中營公費糧銀又聞其
從前將署內家人掛名於標下三營支取糧餉近
因臣嚴行稽查始除名另補臣查大同一鎮地處
邊方關係緊要鎮臣徐起鳳年力既衰似此奉職

有愆恐有貽誤之處臣知之既確不敢瞻徇隱諱
謹據實奏

聞伏乞

皇上睿鑒施行謹

奏

前日之奏覆固屬錯謬今此之奏聞更屬遲延

雍正九年十一月初十日山西巡撫臣石麟謹

奏為恭懇

聖恩俯留能員以濟公務事竊查前准吏部咨開前任山西巡察勵宗萬騷擾勒索案內有濫應夫馬等項之翼城等州縣既各自行檢舉應否查叅等因議覆奉

旨勵宗萬著革任翼城等州縣著照例查叅欽此欽遵臣隨檄行布政司等查揭去後今據開報各職名前來臣查除已經叅故各員及原無額設驛遞因勵宗萬索取自行捐雇夫馬應付之翼城等州縣

俱例無處分應邀免議外所有自行檢舉濫應夫
馬之前任安邑縣知縣今陞保德州知州車敏來
前任臨汾縣知縣今陞遼州知州徐三俊曲沃縣
大計附薦知縣王世銑洪洞縣卓異知縣余世堂
前署靈石縣知縣今署長治縣試用知縣郭麟生
介休縣知縣李壽彭前署徐溝縣知縣今署鳳臺
縣知縣趙炯屯留縣知縣甄爾節襄垣縣知縣劉
德潤聞喜縣知縣李錦祁縣告病知縣羅著藻等

俱例應處分但臣伏查雍正六年內欽奉

上諭督撫等遇屬員愆尤當觀其平日居官如何若係庸碌無能之輩則無足惜倘屬廉幹之員而因此罷斥殊非大臣為國家愛惜人才之道雖定例所在不得不叅然亦當密行奏聞欽此臣查濫應夫馬各員內趙炯甄爾節劉德潤李錦皆係循分供職之員應聽部議外其車敏來徐三俊王世銳余世堂等皆屬廉幹素著之員至郭麟生李壽彭羅著藻等

亦皆辦事勤敏除羅著藻久經告病離任查晉省
現有軍需之際得有幹員辦理更為有益臣不揣
冒昧恭懇

聖恩可否將車敏來等照例議處從寬仍行留任俾現
在辦事不致乏人而各員感戴

天恩益加奮勉矣臣於本月十二日具疏

題叅外謹繕摺密

奏伏乞

聖主睿鑒施行謹

奏

該部議奏

硃批諭旨卷二百十七之三



總校官庶吉士臣侍朝

校對官編修臣莫瞻菴

膳錄監生臣錢敬熙